

KALOGSARAN TO TINUUHAN TO MABCAM

To miting to mgo opisialis woy mgo diligadu to MABCAM to 18 Nobiembre, 2000, nig-uyun ka mgo nig-amut to miting no oggamiton ta ka iam no ‘tinuuhan to MABCAM’, di nigpamuyu sikandan no duon mointok no papil no ogbogoy to mgo kalogsaran to sikan no tinuuhan, woy ogbogoy to mgo birsikulu to Biblia ko hondo i ogkakitaan ka mgo insulat to ‘tinuuhan’. Soini no sulat ian ka tabak to sikan no in pamuyu dan.

To diralom to soini doisok no pohitaga to binunsuran ogkakitaan ta ka tibon ‘tinuuhan to MABCAM’, woy takas to sikan, ogmolog-mologan ta ka kara kagi to sikan no tinuuhan woy ogpamangho ki to kalogsaran to sikan no kagi woy mgo birsikulu no ogpamalagot to sikan.

Ka koon-ingan to soini no ‘tinuuhan’ pighokad noy ligkat to sagboka no tahan lagboy no ‘tinuuhan’ no piggamit to moon-ing mgo simbahan to loin-loin no mgo nasud no pighingaranan to English no ‘Apostle’s Creed’ no to kanta pad ‘Tinuuhan to mgo Apostoles’.

February 2001

Ka Tinuuhan to mgo Sakup to MABCAM

Ogtuu koy no sagboka ro ka Magboboot no nigpoila kanta no Magboboot no Amoy, Anak woy Gimukud. Sikandin waro binunsuran woy waro katamanan. Sikandin ka nighimu to tibo no duon to tano woy dio to langit. Sikandin ka mabogbog to tibo. Sikandin do ka ogsayoon woy og-alagaran noy.

Ogtuu koy ki Hisus Kristu no in-anak ni Maria pinabayo to kabogbogan to Gimukud to Magboboot, agad boi pad si Maria. Si Hisus nigpakamatoy liwan kanta to inlansang sikandin dio to krus, inlombang sikandin, di to igkatatolu no allow nouyag woy on pigbatun sikandin dio to langit. Kuntoon, nigpinnuu sikandin dio to kawatan to Magboboot no Amoy.

Ogtuu koy no duon allow no oglibong si Hisus kai to tano no ogbobootan din ka tibo no mgo otow no namatoy woy ka mgo manokal pad.

Songo ogtuu koy to Gimukud to Magboboot no inpaalap to Magboboot no Amoy woy Anak kai to kanta. Sikandin ka nigtuon kanta to karoyowan woy sikandin ka ogbulig kanta to poghimu to maroyow.

Songo ogtuu koy to Kasulatan no ian ka kinagian to Magboboot no igpatuman kanta.

Ogtuu koy no nakasalo ka tibo no mgo otow duon to Magboboot woy litos no oglogparan din, su ka Magboboot matuwarong woy awoson no oglogparan din ka maroot.

Di ka mgo otow no ogtuu ki Hisus woy ogsolsol to salo dan ogpasayluon to Magboboot woy uromo ko'g uyagon din ka tibo no minatoy, ogbatunon to Magboboot ka mgo nigtuu woy ogbogayan sikandan to kouyagan no waro katamanan. Di ka waro nigtuu to Magboboot, oglogparan din to hapuy no waro katamanan.

Ogtuu koy no pigdogil to langit si Satanas woy ka mgo sakup din no mgo busow tongod su pigsupak dan ka pogboot to Magboboot. To moorian no allow oglogparan sikandan duon to hapuy no waro katamanan.

Soini ka kalogsaran to tinuuhan to MABCAM:

Ogtuu koy no sagboka ro ka Magboboot no nigpoila kanta no Magboboot no Amoy, Anak woy Gimukud to Magboboot.

Dio to Tahan no Kasulatan, klaru lagboy no nignangon ka Magboboot ki Mosis no ‘Sagboka ro ka Magboboot no Igbuyag now.’ Deut 6:4, di songo klaru dio to Iam no Kasulatan (woy agad dio to Tahan) no tatolu ka baad to Magboboot no ian Amoy, Anak woy Gimukud. Unawa kai to ogkakitaan to Matiu 28:19 no nignangon si Hisus to mgo hibatoon din no ogbautismu sikandan to mgo otow to ngaran to Magboboot no Amoy, Anak woy Gimukud.

Ogkoilaan no Amoy ka Magboboot to moon-ing no mgo birsikulu. Unawa kai to ogkakitaan to 1 Kur 8:6. Woy to Matiu 6:25 pohondio to 6:34, songo ka kuo, pighingaranan ni Hisus ka Magboboot no ‘Magboboot’ woy songo ka kuo, ‘ka Amoy’, di klaru no sikan dod ka pighingaranan din to sikan no mgo birsikulu.

Ogkoilaan no Anak ka Magboboot to moon-ing no mgo birsikulu songo. Unawa to ogkakitaan to Huan 1:1 nignangon si Huan no ‘Dongan, to wa pad nohimu ka kalibutan, sikandin no oghingaranan to Kagi, tahan no duon dio to langit. Sikandin ka duma to Magboboot woy Magboboot ian sikandin.’ woy dio pad to birsikulu 14 pohondio to 18, nigpoila si Huan no si Hisus Kristu ian ka inpasabut din no ‘Kagi’. Duma no mgo birsikulu no oghisgut to Anak no Magboboot ian ka Filipos 2:6, woy Matiu 26: 63-64.

Ogkoilaan no Gimukud ka Magboboot to Tahan woy Iam no Kasulatan. Unawa to ogkakitaan to Mgo Hinimuan 5:3-4. To birsikulu 3, nignangon si Pedro no nig-ubat si Ananias duon to Gimukud to Magboboot, woy to birsikulu 4 nignangon no nig-ubat sikandin to Magboboot, woy klaru no unawa ro ka igpasabut din. Woy moon-ing ka mgo birsikulu no nignangon bahin to Gimukud to

Magboboot woy ka tarabahu rin, no unawa to duma no mgo birsikulu no nignangon bahin to Magboboot; hoo su unawa ro sikandan: Huan 16:8, Hibriu 10:30

Sikandin waro binunsuran woy waro katamanan.

Waro nighimu to Magboboot; tahan on no duon sikandin to waro pad pighimu ka tibo. Unawa to ogkakitaan kai to Genesis 1:1 ‘To binunsuran, pighimu to Magboboot...’ Tahan on no duon sikandin. Episu 1:4, ‘Dongan no waro pad nohimu ka soini no kalibutan, pig-aam kinow on to Magboboot...’ hoo su duon on sikandin tahan. Waro binunsuran din su sikandin ka binunsuran: Impapitow 22:13. (Alpa ian ka an-anayan no litra to alpabitu to Griego, woy Omega ian ka katapusan no litra).

Waro katamanan sikandin. Salmo 10:16 nignangon no oghari ka Magboboot taman to taman su waro katamanan din. Marasig pad ka mgo birsikulu no ognangon to kabogbogan to Magboboot taman to taman. Impapitow 1:18, 15:7, Salmo 45:6, Exodu 15:8

Sikandin ka nighimu to tibo no duon to tano woy dio to langit.

Ligkat to binunsuran to Genesis, klaru lagboy no ka Magboboot ian ka nighimu to tibo. Waro pighimu ko konon pinabayo kandin. Moon-ing no mgo birsikulu to Biblia no nignangon to sikan: 2 Hari 19:15, 2 Cron 2:12, Isa 37:16, Jonas 1:9, Hinimuan 4:24, Huan 1:3.

Sikandin ka mabogbog to tibo.

Nigpoila ka Magboboot to sagboka no ngaran din ki Abraham no to Hibriu no kinagian ‘El Shaddai’ no to kanta pad “Magboboot no Mabogbog to tibo” (Gen 17:1). Songo duon duma no mgo birsikulu to Biblia no nignangon no ogpokohimu ka Magboboot to agad nokoy; waro botang no kono din ogkokohimu. Genesis 18:14, Jeremias 32:17, Matiu 19:26.

Sikandin do ka ogsayoon woy og-alagaran noy.

To pogbogoy to Magboboot to sampulu no sugu ki Mosis woy to koot-otowan din, nignangon ka an-anayan no sugu “Waro loin no tinuohan no oggaaton nu ko konon sikoddi do.” Exodu 20:3, Deut 5:7 Woy to pig-ol-oogan si Hisus ni Satanas to pogluhud kandin, nigtabak si Hisus no ka Magboboot do ian ka ogsayoon noy woy og-alagaran noy. Mat 4:10, Luk 4:8.

Ogtuu koy ki Hisus Kristu no in-anak ni Maria pinabayo to kabogogan to Gimukud to Magboboot, agad boi pad si Maria.

Innangon dongan to Magboboot no duon oglopow no hari no ogkootow dio to boi no dalaga pad (Isa 7:14). Natood soini to pogkootow ni Hisus dio to ki Maria. (Lukas 1:26-38). Kono ogpasabut soini no ogsayoon ta si Maria, su otow ro sikandin unawa ro to kanta, woy sumalo to nabasa ta dio to ampow no ka “ka Magboboot do ian ka ogsayoon ta”. Ogdoromdom ki ro no maroyow no boi si Maria su andam sikandin to og-alagad to Magboboot (Lukas 1:38), woy no pigboligan sikandin to Magboboot (1:28), di sikan do taman.

Si Hisus ka nigpakamatoy liwan kanta to inlansang sikandin dio to krus, inlobong sikandin, di to igkotatolu no allow nouyag woy on pigbatun sikandin dio to langit.

Nignangon si Matiu, Markos, Lukas woy Huan no namatoy si Hisus no piglansang sikandin duon to krus (pinogsumbalak no kayu). Matiu 27:32-56, Markos 15:21-41, Lukas 23:26-49 woy Huan 19:16-37. Nignangon ka Ruma 6:23, ka bayad to salo ian kamatayon. Litos no oglogparan ki poron. Nignangon kai to Ruma 3:23 to “su ka tibo no mgo otow makasasalo to Magboboot...”. Di, to namatoy si Hisus, sikandin ka nigtinawo to logpad su waro salo din. To Ruma 3:25-26 nignangon si Pablo no si Hisus namatoy liwan kanta unawa ro to halad no litos to pogbayad to salo. Songo nasulat to Hibriu no waro

salo ni Hisus (Hib 4:15) woy no namatoy sikandin liwan kanta (Hib 10:14).

Inlobong si Hisus ian sumalo to Matiu, Markos, Lukas woy Huan. Dio sikandin piglobong to sagboka no pilang no piglokoban to dakol no batu woy pigbantayan to mgo sundalu. (Mat 27:57-66, Mar 15:42-47, Luk 23:50-56 woy Huan 19:38-42).

To igkatatolu no allow nouyag si Hisus. Songo ogkakitaan soini to Matiu, Markos, Lukas woy Huan. Namatoy sikandin to allow to kono pad no Sabado (Biernes to kanta) Markos 15:42 woy to Sabado waro nighondio ka mgo otow dio to piglobongan su allow to poghimoloy. Nighondio do sikandan to masolom pad to an-anayan no allow to simana, Domingo to kanta (Huan 20:1). Igkotatolu no allow ian sikan ligkat to pogkamatoy rin. Poglopow ran dio to lobonganan, noonsig on ka batu no niglokob to pilang, woy pogpitow ran to solod, warad on ka lawa ni Hisus. Wa do malingon-ngon no nigpapatow si Hisus ki Maria no matig-Magdala (Huan 20:10-18), woy to sikan no marusilom nigpapatow si Hisus to mgo hibatoon din (Huan 20:19-23), woy nighutuk-hutuk sikandin nigpapatow kandan solod to 40 no allow (Mgo Hinimuan 1:3, Luk 24 13-35, Huan 20:24-29, 21:1-14).

Pigbatun sikandin dio to langit. Ogakitaan soini to Markos 16:19, Lukas 24:50-53 woy mgo Hinimuan 1:1-11. Songo pignangon soini to duma no mgo sulat to iam no kasulatan (Episu 4:10, Hib 1:3, Hib 12:2, Impapitow 3:21).

Kuntoon, nigpinnuu sikandin dio to kawanan to Magboboot no Amoy.

Nigpasabut soini no nighari si Hisus duma to Magboboot no Amoy. Ogakitaan soini to Impapitow 3:21.

Ogtuu koy no duon allow no oglibong si Hisus kai to tano no ogbobootan din ka tibo no mgo otow no namatoy woy ka manokal pad.

Moon-ing ka mgo birsikulu to Biblia no ogkagi bahin to allow to pogboot to Magboboot to tibo. Dio to Iam no Kasulatan, si Hisus ka pighingaranan to soini. Ogakitaan soini to Mgo Hinimuan 1:10-11 woy to 2 Tim 4:1.

Songo ogtuu koy to Gimukud to Magboboot no inpa-alap to Magboboot no Amoy woy Anak kai to kanta.

To Huan 14:16-17 woy 26 nigkagi si Hisus no ka Amoy ian ka ogpaalap to Gimukud to Magboboot pinabayo to kandin no ngaran, di to Huan 15:26 si Hisus ian ka ogpaalap to Gimukud ligkat to Amoy. Sikan ian no ognangon ki no nigligkat to Amoy woy to Anak su nasagboka sikandan.

Sikandin ka nigtuon kanta to karoyowan woy sikandin ka ogbulig kanta to poghimu to maroyow.

Moon-ing ka mgo birsikulu no nignangon ko nokoy ka tarabahu to Gimukud to Magboboot. To Huan 14:26 nignangon si Hisus no ogtuon ka Gimukud to Magboboot kanta, woy to ogpadoromdom sikandin kanta to mgo kinagian ni Hisus. To Huan 16:8 nigkagi si Hisus no ogtuon ka Gimukud to Magboboot kanta ko hondo ka maroot, woy ko hondo ka maroyow. Duon mgo panunggilingan to pogbulig to Gimukud to Magboboot to mgo otow iling to Ruma 8:26, 2 Tim 1:14, Ruma 8:14 woy Gal 5:18-26

Songo ogtuu koy to Kasulatan no ian ka kinagian to Magboboot no igpatuman kanta.

To 2 Tim 3:16-17 nigkagi si Pablo no ka tibo no mgo Kasulatan nigligkat to Magboboot woy no ogtuon kanta to poghimu to maroyow.

Ogtuu koy no nakasalo ka tibo no mgo otow duon to Magboboot...

Nigkagi si Pablo dio to Ruma 3:23 no nakasalo ka tibo no mgo otow duon to Magboboot. Woy nigkagi si Huan dio to 1 Huan 1:8 no ko ogtuu ki no waro salo ta, nig-uubat ki ro to goinawa ta.

woy litos no oglogparan din,

Nigparagas si Pablo dio to Ruma 6:23 to pogkagi no ka bayad to salo ian ka kamatayon. Waro mognangon sikandin no ka bayad to ‘dakol no salo’, woy ko ‘moon-ing no mgo salo’ ian kamatayon, ko konon ‘salo’ do. Agad nokoy no salo, litos no oglogparan to Magboboot pinabayo to kamatayon.

su ka Magboboot matuwarung woy awoson no oglogparan din ka maroot.

Nigkagi si Daniel no matuwarung ka Magboboot dio to Dan 9:14. Songo nigkagi ka duma no mgo birsikulu no ka Magboboot maroyow (Salmo 73:1), balaan (Salmo 99:9) woy litos ko ogboboot sikandin (Salmo 51:4).

Di ka mgo otow no ogtuu ki Hisus woy no ogsolsol to salo dan ogpasayluon to Magboboot

To Episu 2:8 nigkagi si Pablo no pinabayo to pogtuu ogkaluwas ki. Woy to 1 Huan 1:9 nigkagi si Huan no ka Magboboot ogkasaligan woy litos ka pogboot din no ko ogsolsol ki to mgo salo ta, oghugasan ki rin woy og-awoon din ka mgo salo ta. Songo nigkagi si Pablo to Ruma 5:1 no nohimu kid no matuwarong to pogpitow to Magboboot pinabayo to pogtuu ta kandin.

woy uromo ko og-uyagon din ka tibo no mgo minatoy, ogbatunon to Magboboot ka mgo nigtuu

To 1 Kurintu 6:14 nigkagi si Pablo duon to mgo nigtuu no kagi ‘ogbatunon ki duma ki Kristu’, woy to Huan 6:40 nigkagi si Hisus no ko ogtuu ki kandin ogbatunon ki to langit to mourian no allow.

woy ogbogayan sikandan to kouyagan no waro katamanan.

Tibo ki bua nataga to saad ni Hisus to Huan 3:16 no ka tibo no ogtuu kandin ogkabogayan to kouyagan no waro katamanan. Piglibong-libong ni Huan ka kinagian bahin to kouyagan no waro katamanan. Unawa to ogkakitaan ta to 3:36, 5:24, 6:40 woy 10:28

Di ka waro nigtuu to Magboboot oglogparan din to hapuy no waro katamanan.

Dio to samingay ni Hisus bahin to mgo karniru woy mgo kambing, ka mgo otow no waro mog-alagad to Magboboot pigdogpak to lanow no hapuy no kono ogkoobukan duma to mgo busow woy ki Satanas. Nignangon ka Impapitow 20:15 no ko duon otow no waro ka ngaran din duon to libru to kinabuhi, pigdogpak sikandin duon to lanow to hapuy, woy songo nignangon to 21:27 no ka mgo waro igkasawoy ro ian ka duon ngaran to libru to kinabuhi, woy nakita tad on no ka nigtuu ro ki Hisus ian ka ogkohimu no waro igkasawoy.

Ogtuu koy no pigdogil to langit si Satanas woy ka mgo sakup din no mgo busow

Nignangon ka Pinadayag 12:7-9 no si Satanas ian ka Ulod to Genesis 3, woy indogpak sikandin pohondio to tano duma to tibon mgo anghel din (no ian ka mgo busow). Songo dio to Isaias 14:12 nignangon-nangon ka propeta tongod to Buntatao no pigdogpak duon to tano (songo panunggilingan ni Satanas sikan). Nignangon ka 2 Pedro 2:4 woy ka Judas 6 no piglokob to kalabusuan ka mgo busow.

tongod su pigsupak dan ka pogboot to Magboboot.

Songo nignangon ka Isaias 14:14 no nigkoiniat si Satanas no ogkounawa sikandin to Magboboot. Woy dio to pogol-olog ni Satanas ki Jesus duon to hawanan, nigpoomot sikandin no ogkatintal si Jesus porom to poghimu ko nokoy ka supak to pogboot to Magboboot. (Matteo 4: 1-11)

To moorian no allow oglogparan sikandan duon to hapuy no waro katamanan.

Nignangon si Jesus duon to Matteo 25:41 no ka impiernu (no songo ogkohingaranan no lanow to hapuy) pighimu alang ki Satanas woy ka kandin no mgo sakup no mgo busow. Songo ogkabasa ta duon to Pinadayag 20:10 no ogkalogparan si Satanas duon to lanow to hapuy to waro katamanan.